

<p>Graad RRR</p> <p>HOP, HOP, HOP! deur Onbekend</p> <p>Hop, hop, hop! Hop perdjie hop! Oor die klippe, oor die slote. trap versigtig met jou pote Hop perdjie hop!</p>	<p>Graad RR</p> <p>Vingerling deur Onbekend</p> <p>Duimpie het in die water geval, Lekkerpot het hom uitgehaal, langeraad het hom huis toe gedra, fielafooi het hom neergelê, en Pinkie het vir Ma gaan sê.</p>
<p>Graad R</p> <p>Opgelos deur B. Traas</p> <p>Haai! Volstruis, met jou lang nek! Kan jy hom nóg langer rek? Kan jy hom nóg langer maak dat jy aan die dak kan raak?</p> <p>Kyk dan tog 'n bietjie daar of jy nie my bal gewaar! Ek het hom netnou hier verloor, kyk tog mooi, Volstruisie, hoor?</p>	<p>Graad 1</p> <p>My baie name deur Elizabeth van der Merwe</p> <p>My naam is Johannes en somtyds Johann, of Hansie-my-diertjie as Ma iets verlang. Hul noem my Johannes as ek begin skree, En as ek wil kwaad doen 'Johannes Naudê!'</p> <p>Maar saans as dit skemer is en Pappa vertel van Wolf en van Jakkals en hoe Slang vervel, dan noem hy my Jannetjie Janneman Jy en dit klink nog altyd die mooiste vir my.</p>
<p>Graad 2</p> <p>Kat en muis deur Helena J. F. Lochner</p> <p>'n Kat sê eendag vir muis: "Ek voel tog so alleen, kom speel hier met my in die huis, dan gee ek jou 'n been!"</p> <p>"Nee dankie," sê die slimme muis. "Ek bly maar weg van jou – by katte voel ek glad nie tuis, hul wil my beentjies kou!"</p>	<p>Graad 3</p> <p>Muskiet deur Pieter W. Grobbelaar</p> <p>Haai! Muskiet, jou zoemerige ding: al op die een noot sing, sing, sing.</p> <p>Zoei! Teen die dak, en zoei! om my kop, zoei! teen my neus – en dáár sit die knop.</p> <p>A-nee-a, Muskiet, laat staan nou jou nuk, of ek sal jou mos papeletjies druk.</p>

Graad 4

Dinosourus deur Onbekend

Ou grote met jou stekelrug,
ek hoef tog nie vir jou te vlug,
jy en jou oupa is lankal dood –
daar's net jou bene in die sloot.

Toe jy deur die varings loop
en al die groen lê wyd en oop,
kon jy nes jy wou baljaar –
dis alles in die rots bewaar.

En later toe jou vyand kom,
Was jy so magteloos teen hom.
Jy moes soos alle helde sterf.
Net jou geraamte kon ons erf.

Graad 5

Spookstories deur Anoniem

Die nagwind treur sag deur
die bome daar buite,
en maanlig skyn flou op
my kamer se ruite.

Hier bo, uit die donkerte,
roep 'n ou uil –
daar ver oor die bult gaan
'n hond aan't huil.

My sussie en ek sit
met groot oë en bewe;
ek sidder en bibber,
al is ek al nege.

Benoud klop my hart
doef! doef! doef! in die duister
terwyl ons na oupa se
spookstories luister!

Graad 6

Prysuitdeling deur Jaco Jacobs

“Prysuitdeling! Prysuitdeling!
Dis die toppunt van verveling!
Klas vir klas en ry vir ry –
Gaan elkeen tagtig pryse kry?
Ek's honger en my keel is droog,
Maar tyd staan stil op die verhoog.
Iemand, kom, vertel 'n grap!
My hande is al lam geklap.
Naam vir naam word uitgelees,
Daar's drie-en-sewentig trofees –
trofees vir elke liewe ding.
Van bokdrolspoeg tot driebeenspring!
Ek's regtig trots op jou, verstaan,
Maar wanneer kan ons huis toe gaan?!”
Die prysuitdeling is verby!
Ma skud haar kop en sê vir my:
“Was daar 'n prys vir brom en kla,
was die wenner
-reg geraai-
JOU PA!”

Graad 7

Die vis deur Marie Niemeyer

Ek is 'n wilde, woeste haai
wat jakker in 'n vreemde baai.
Ek flits deur water diep en blou
om snoek te vang en kabeljou.

O, ek is 'n woeste vis.
Hul koes maar as ek honger is.
Hul's bang vir my; ek swem so gou.
Ek spoor hul op en vreet hul rou.

Ek dartel oral heen en weer,
die branders slinger op en neer.
Hul breek in skuim, ek duik weer in,
bo sien hul net my vin.

Nou gly ek oor die diep seesand;
maar ag, daar's Ma weer buitekant!
“Spat jy alweer die vloere nat?
Karools klim dadelik uit die bad!”

Graad 8-9

Die verkleurmanneltjie

deur C. Louis Leipoldt

Daar op die vy'boom sit die vabond,
so sedig soos 'n predikant;
maar glo tog nie dat hy so vroom is –
nee, regtig nie, hy is astant!

As jy hom aanraak, dan verkleur hy –
geel, rooi, grys, bruin en blou en groen;
sy hele vel blink soos die skulpies
se binnekant met perlemoen.

So teem'rig sit hy op sy takkie
die muggies met sy tong en vang,
en met sy ronde oë maak hy
die spinnekoppe algar bang.

Hy draai sy nek soos 'n toktokkie,
of soos 'n papie uit die klei,
en kyk so sedig na die vliegies
as hy die goed nie beet kan kry.

Arrie, ek hou van jou, kleurklasie!
Jy gaan jou lewe deur so mooi;
jy steur jou nie aan wat die mense
so praat of skinder en flikflooi.

Jy steun op niemand nie, kleurklasie –
net op jou takkie en jou tong.
Verkleur maar more net soos gister;
en as jy oud word, bly nog jong!

Graad 10-12

Die kleur van vrees

deur Anoniem

Ek is soms bang, weet jy,
vir spinnekoppe ... donkerte ... seerkry,
vir donderweer en boewe en baklei,
vir eensaam wees, aan siektes ly.
Ja, ek is soms baie bang. En jy?

En het jou bang ook kleur?
Kom dink maar weer 'n keer
en jy sal agterkom jou vrees
kan allerhande kleure wees.

Die hol kol op my maag is groen
as ek 'n opstel oor moet doen,
en deelneem aan ons atletiek
laat voel my regtig spiérwit siek.

Dat mense dalk met my sal spot –
dië vrees sit soos 'n harde klont
wat swel bo in my keel;
die kleur daarvan is skreeuend géél.
Die vrees vir straf is skerp en hard,
die kleur daarvan is teerbladswart.
En as my ma en pa baklei,
dan voel ek pers van bang en skei.

Dat maats my net sal ignoreer –
die vrees daarvoor is grys en seer
en gryp my skouers soos 'n jas
wat elke keer al nouer pas.

Vir ongelukke en vir pyn,
vir al die siektes wat 'n mens laat kwyn,
vir moord en roof en vir terreur –
die vrees dáárvor klopp rooi en seer.
Maar ja, daar is ook dinge wat ek vrees,
waarvoor ek soms só bang kan wees,
waarvoor ek liever doodstil bly...
want ek is ook bang vir praat daaroor - nes jy.